

# Pilihanraya UPM meriah

**SERDANG**, Ogos 21: Kampus UPM menjadi begitu unik dengan tergantung ribuan poster-poster terutama dari dua kem pelajar iaitu kem AMB (Angkatan Mahasiswa Bersatu) dan kem IPKM (Intelektual Pendukung Kebijakan Mahasiswa). Manakala poster calon-calon bebas tidaklah begitu banyak berbanding calon-calon kedua-dua kem. Editor *Tribun Putra* yang turut berada di malam pengiraan undi di Pusat Kesenian dan Kebudayaan Sultan Abdul Aziz Shah UPM sempat merakamkan detik-detik bersejarah bagi calon-calon yang bertanding.

Abdul Karim Mohd. Sarif, siswa Fakulti Ekonomi dan Pengurusan, calon kerusi bebas yang mewakili kem AMB berpendapat pilihanraya kampus merupakan kemuncak aktiviti kepemimpinan siswa di menara gading. Manifesto AMB berkisar kepada sedia mendukung aspirasi sejagat menjadi tonggak perjuangan mereka bagi mewujudkan perhubungan yang lebih erat diantara pelajar, pentadbir dan seluruh warga kampus. Beliau menambah, "Sejajar dengan perkembangan IT masakini, AMB turut menyediakan laman web rasminya bagi menyebarkan maklumat perjuangan mereka."

"Dalam kegawatan ekonomi sekarang, saya syorkan proses pengundian bagi Pilihanraya Kampus masa mendatang haruslah menggunakan teknologi maklumat sepenuhnya. Disamping menjimatkan kos dan masa, kita akan dapat mengetahui keputusannya dengan lebih cepat berbanding cara tradisi.", kata beliau yang berasal dari Beruas, Perak.

Syor beliau turut disokong oleh rakan seperjuangannya iaitu Cik Juraida Zainun, anak kelahiran Kuala Kangsar Perak yang juga calon kerusi bebas AMB mewakili Fakulti Sains dan Pengajian Alam Sekitar. Menurutnya, "Itu adalah satu kaedah yang baik, namun aspek keselamatan harus diambil kira bagi mengelakkan sebarang manipulasi atau penipuan berlaku keatas proses pengundian secara digital". Seperti beberapa orang siswa yang ditemui sewaktu proses pengundian undi sedang berlangsung, beliau merakamkan kekesalan dengan gaya kepemimpinan MPP sesi lepas yang dikatakan agak dingin

melaksanakan aktiviti siswa yang dapat memupuk minda dan sahsiah warga kampus.

"Mahasiswa UPM masakini sebenarnya inginkan perubahan kepemimpinan Majlis Perwakilan Pelajar (MPP). Rata-rata pelajar berpendapat MPP yang diterajui oleh kem IPKM (Intelektual



*Cik Juraida Zainun (AMB)*

Pendukung Kebijakan Mahasiswa) agak goyah dari segi kepemimpinan dan pengajaran aktiviti-aktiviti siswa sepanjang sesi 1997/1998," katanya lagi.

Cik Juraida dengan tegas menambah "AMB berjanji akan memperjuangkan hak-hak mahasiswa dari aspek kebajikan, keselamatan, penempatan dan sebagainya. Sekurang-kurangnya mahasiswa ada suara lantang di kampus hijau ini".

Sementara itu seorang calon bebas dari Fakulti Sains dan Pengajian Alam Sekitar iaitu Wee Don Juan, anak kelahiran Klebang Melaka, yang tidak mewakili mana-mana kem, berpendapat beliau sekadar ingin memimba pengalaman menjadi calon MPP, sekurang-kurangnya ia menjadi satu pengalaman yang manis sewaktu berada di kampus berteknologi tinggi yang berdekatan dengan bandar Cyber Jaya. Kalah atau menang bukanlah perkara utama dalam perjuangan saya.

Beliau mengakui sebagai calon bebas tanpa kem, proses kempen yang beliau dan penyokong beliau jalankan agak terhad akibat faktor kewangan dan tenaga kerja.

"Saya hanya mampu membuat salinan foto hitam putih sahaja bagi poster-poster manifesto berbanding calon-calon dari kem AMB yang menggunakan warna rasmi merah dan IPKM menggunakan warna biru.

Namun begitu saya tidak mudah menyerah kalah begitu sahaja," tegas Wee yang bercita-cita untuk menjadi ahli politik yang terkemuka suatu hari nanti.

Seorang calon kerusi bebas dari kem IPKM iaitu J. Ravinterakumar ketika ditemui menegaskan asas perjuangan IPKM adalah menjaga kebajikan siswa yang terdiri dari berbagai kaum dengan manifesto yang bertajuk mahasiswa untuk mahasiswa. Siswa tahun 2 dari Fakulti Kejuruteraan yang penuh pengalaman kepemimpinan semenjak dari sekolah lagi berpendapat para siswa perlu berani menunjukkan bakat kepemimpinan yang ada agar dapat dimanfaatkan dan dikongsi sepenuhnya bersama siswa kampus.

"Ini adalah penting kerana hanya dikampus sahaja individu dapat menunjukkan bakat kepemimpinan yang tinggi sebelum memasuki dunia pekerjaan yang agak kompetitif sekarang. Pelajar harus sedar, dunia siswa adalah satu yang amat manis dan harus dipenuhi dengan pelbagai aktiviti yang mampu meningkatkan keyakinan dan sahsiah individu. Janganlah masa yang singkat di kampus dibuang begitu sahaja dengan aktiviti-aktiviti yang kurang berfaedah", jelasnya.

"Siswa harus bijak mengurus masa dengan kuliah, gerak aktiviti kokurikulum dan sebagainya agar siswa yang dihasilkan oleh UPM berkualiti tinggi baik dari aspek akademik, mahupun daya kepemimpinan." kata Ravi sambil tersenyum.

Sementara itu, Norfizin Yusof, siswa tahun akhir di Jabatan Fizik, anak kelahiran negeri Cik Siti Wan Kembang yang pernah bertanding Pilihanraya Majlis Perwakilan Pelajar sesi 95/96 turut berada di pusat pengiraan undi. Walaupun tewas atas tiket AMB ketika itu, namun beliau berpendapat pengalaman menjadi calon adalah sesuatu yang menyeronokkan dan tidak mengganggu pelajaran kerana jangkamasa kempen adalah singkat dan beliau bijak mengatur masa. Norfizin penyokong kuat kem AMB amat berharap agar kem AMB yang memenangi pilihanraya ini dapat menggunakan mandat yang telah diberi oleh pelajar digunakan sepenuhnya untuk kebajikan pelajar dan bukannya untuk kepentingan individu.